

索使道理洞徹此心虛靈不昧之謂也即大學之物格知至孟子之知性知天其以虛靜為言蓋因所問而答之而大意自極分明呂錄則增入要識得這物事等語與沈錄大不同明繫國秀自以己意託之朱子以合前說且云敬是第二節事則是先要識得此物事而後虛靜虛靜而後能敬也豈其然乎敬者聖學之所以成始成終朱子再三言之問者曰於敬而無失上用功原自不錯今又謂其夾雜鶻突而所云識得這物事與問語全不相對值必非朱子語也只以沈錄對勘之則其得失自見而呂錄之不可據亦不待辨說而益明矣

工部都水司郎中臨川李秉綬刊

皇清經解卷二百四十三終

嘉應楊懋建舊校
番禺趙齊嬰新校

皇清經解卷二百四十四

學海堂

周禮疑義舉要

婺源江歲貢 永著

天官

周禮六卿之制至成王末年猶可考顧命同召大保奭芮伯彤伯畢公衛侯毛公是六卿也迨其後而官制改別有一人為卿士執政冢宰位在其下故詩云皇父卿士番維司徒家伯維宰今詩誤作家伯冢宰仲允膳夫蓋上卿執政者皇父而家伯雖為宰非復統百官均四海之職矣至東遷後又有兩卿士虢公忌父為右鄭莊公為左則當時之為宰者位益卑是以宰咺歸賄宰渠伯糾來聘魯史直書其名本非上卿執政者也說春秋者猶以周初冢宰之制言之考之亦不詳矣

八則治都鄙注專指采地然亦當兼公邑言之法則以馭其官謂食采之公卿大夫及治公邑大夫

內史八枋卽大宰之八柄爵祿以後其序各異言之有不同耳大宰詔王有寬大之意故先予置生而後奪廢誅內史詔王有嚴肅之意故廢先於置殺先於生而且以殺易誅也子奪則仍如故有子而後有奪也凡賜予皆爲予圭瓚車馬衣服旌旗弓矢鉞鉞虎賁皆予之大者幸與福一例得子則爲幸得生則爲福生謂以八議生之內史言殺此言誅以馭過輕重各舉一隅也

八統六曰尊貴鄭引孟子三達尊及祭義證之則貴中兼有爵齒德達吏與使能異能者因其有才而任之達吏者察其勤勞而進之

九職任萬民皆任之以生財大學所謂生之者眾也九職外有學士習道藝巫醫卜筮守世事府史胥徒服公事皆非所以生財故不在九職之數而大司徒并之爲十有二天下之民盡此矣九職生財卽閭師之八貢與無職者之夫布然亦稍有不同九職合虞衡爲一而有臣妾聚斂疏材閭師無疏材之貢而分虞衡爲二亦得九大府所謂九功者也

三農先鄭云平地山澤後鄭云原隰平地皆未當山澤之農自屬虞衡不生九穀原隰與平地無異又不可分爲三近世惠士奇著禮說云三農上農中農下農也管子揆度篇曰上農挾五中農挾四下農挾三小司徒上地中地下地分爲三者以此此

說甚確

九穀從後鄭黍稷稻粱麥苽菽菽有大小

虞衡猶云山澤借官名以名民職非謂掌山澤之官

藪牧養蕃鳥獸不必家畜藪牧之民各守其地野鳥獸取之有

時是亦所以養蕃之疑藪牧之民有二種其受田於遠郊者則

貢家畜其處山澤與邦田之地者則貢野鳥獸

若後世獵戶

家畜入

于遂師而遂師以共野牲其卵鳥則掌畜復養而共之野鳥獸

入于迹人獸人與掌畜而諸官以共膳人庖人之用其脈絡皆

可考

八材先鄭本爾雅珠象玉石木金革羽遺搏埴之工且珠之用

少當不特設一工宜以曲禮土金石木獸草之六材而益以玉

羽

臣妾奴婢也貧民鬻身為人奴婢閭師無疏材之貢恤其貧也

而九職生財必及之質人掌成市之貨賄人民注人民奴婢即

此經之臣妾也庶人商賈家皆有之

閭民傭力之人執事於農工商賈圃牧虞衡之家轉徙無常即

閭師之無職者

賦者徵取財物之總名自一至六以三農九穀為主而草木鳥

獸器用布帛及閭民夫布皆有之唯臣妾無賦關市則商賈也

山澤則虞衡也關市山澤獨別出者自邦中至都鄙皆有關市

山澤別為二賦不與六賦混也幣餘之賦則已用之餘取之於

掌事者故居末

文王治岐其時或爲商者少貨賄未能阜通故弛征以優之至成周定爲經國常法不得不設關市之征以抑之孟子征商始賤丈夫固有此理然自商農旣分兵賦不得不出于農則貨賄不得不取諸商蓋必如是而政始均民志始定也但其後漸流于暴耳讀周禮者以此思之或可無疑于關市之賦

馬貴與謂三代貢助徹皆視田而賦之未嘗別有戶口之賦恐不然孟子明言有布縷粟米力役三征粟米田賦也布縷戶賦也力役之征服役者以力代賦不能赴役如閒民者使出夫布是卽口賦也布縷出於嬪婦而一夫有五畝之宅種桑麻所以有布縷之征唐之租調庸倣此三征但其後行之有弊耳

九賦皆九功之財關市山澤之賦亦卽在邦中四郊甸稍縣都之中幣餘之賦亦卽八賦中之餘財何以別出三種列而爲九蓋九賦因九式而分者也觀大府職可知矣賓客芻秣工事匪頒幣帛祭祀羞服喪荒好用因國之用財有此九事故於通國之賦先分之爲九以待九式之用酌其所入所出之多寡約畧相當準之以爲式焉非謂王之膳服必出於關市國之喪荒必取諸山澤也其財物畧相當焉耳他賦與式皆倣此惟幣餘一賦從八式所用之餘而生因王不能無賜予故於八式所用之財常畱有餘特設職幣一官掌之是以賦與式皆有九也先儒不明此義釋賦爲口率出泉引鄉大夫之征力役者以爲口賦釋關市山澤爲占會百物幣餘爲占賣國斤幣皆未作當增賦引漢之賈人倍算況之失之遠矣漢之口率出泉周禮亦有之

閭師言凡無職者出夫布是也此因閒民一職轉移執事於人不能赴公旬三日之役故使出夫布以當之猶後世之丁錢及僱役錢不可以此通釋賦字也

八則言賦貢以馭其用則都鄙亦當有賦入于王司勳凡頒賞地參之一食疏去若采地之稅則四之一與小國入天子同是謂采地有賦此條家削之賦至邦都之賦疏謂三等采邑出泉賦于公卿大夫而三等公邑則出泉賦于王蓋揭采邑表公邑與後疏違異非是

賓客來固有幣帛芻秣又別爲二式者王朝遣使存頰省聘問亦用幣帛牛人牧人諸官自有芻秣十二閑之馬用芻秣尤多也

也
匪頒之式見于經者廩人匪頒稍食也宮正內宰王宮后宮之稍食也橐人外內朝冗食者之食也百官有無采邑者其稍食當掌於司祿而職缺矣又如膳夫肉脩之頒賜也酒正之秩酒也宮伯司裘之頒衣裘也司裘羅氏之行羽物也凌人之頒冰也皆匪頒之類是皆有常數者其出於恩好賜予則入好用之式

器貢若魯壺之屬傳曰諸侯之封皆有以鎮撫王室又曰彝器之來嘉功之由疏謂諸侯常貢無成器未確

牧以地得民長以貴得民從鄭注詩曰克長克君諸侯固有長稱主以利得民從先鄭古者公卿大夫食邑與其民一體相恤

詩曰我取其陳食我農人是也吏以治得民鄉遂及公邑之吏友以任得民德行道藝相勸吉相慶凶相恤緩急相救有無相通是也而同井合耦耨作亦其一鄭注專以耨作言狹矣

及執事眡滌濯及與也謂與諸執事官眡滌濯也小宗伯言及執事者三及執事禱祠于上下神示及執事涖大斂小斂及執事眡葬獻器與此文正相類彼三處鄭皆以執事之官釋之此獨云執事初為祭事祭前日之夕非也

縣法于象魏疑一歲有兩縣正月之吉縣之挾日為萬民觀也正歲則又縣之使屬官觀之也大宰小宰大司徒小司徒大司寇小司寇各言其一耳鄭注謂正歲而縣于象魏與經文承正月之吉者不協易氏紱謂小宰率屬觀于已斂之後使已斂之後不再縣則何觀

象魏為闕亦名兩觀春秋雉門及兩觀災似兩觀在雉門之兩旁王之外朝在庫門外雉門在庫門內庫門當亦有闔人守之而萬民得入豈為觀縣法此十日內特許之歟凡言歲終者周正之季冬鄭注見宰夫職聽祿位以禮命爭祿位如周甘人與晉閻嘉爭閻田王叔陳生與伯輿爭政之類

七事注謂先四事如之者三事非也愚謂祭祀一朝觀會同賓客二軍旅三田四役五喪六荒七

周雖改時改月而夏正兼存故有正月有正歲鄭注正月周之正月正歲謂夏之正月此說最確凌人正歲十有二月令斬冰

謂夏正歲之十二月建丑之月也若非丑月則無冰可斬後儒多從鄭注惟柯氏葉氏反其說非是近人有謂正月正歲皆建子者尤非

凡失財用物碎名者以官刑詔冢宰而誅之失財謂典守財而失之用物謂私用官物碎名通上二事謂巧爲規避或誘罪於他人誅之治其罪且責其償也注謂財爲泉穀用爲貨賄物爲禽獸以下經分爲三非是下經足用長財善物所指各異

足用謂度支有方而用不匱長財謂經理有法而財自生善物如牧養肥充制作精良之類此皆能稱職者故賞之賓賜之飧牽後鄭謂飧客始至所致禮非也此謂或有時賜之小禮餼牽耳始至致飧前言牢禮中已兼之

豆謂之籩則籩亦可通稱爲豆王制亦有乾豆之文凡祭祀酒正以法共五齊三酒以實八尊通言之非一祭中具備也觀司尊彝六尊不竝用可見漢儒謂祫大于禘故疏家云祫備五齊禘備四齊此以意言之耳禮運諸篇雜陳天子諸侯宗廟之祭未有及泛齊者則泛齊惟用之祀天地

四飲之醫後鄭引內則以醑爲醴釋之內則注云釀粥爲醴初疑粥如何可釀訪問今時北方造黃酒之法先煮黃米爲粥乃入麴蘖釀之成酒正與鄭注合此惟黃米可釀粥而秫稻則否黃米蓋卽古之黃粱又內則重醴中亦有梁醴蓋炊飯而釀者爲醴煮粥而釀者以醑爲醴也先鄭以醑釋醫別爲一義未確下言后夫人致禮醫亦有糟醑爲梅醬安得有糟乎

醴有清有糟而四飲惟有清者蓋糟醴與醴齊同已於五齊中辨之也

三酒以清爲下蓋賤者所飲豈可以之澆盞齊記云醴酒澆于清豈謂五齊中最清如沉齊者與

酒人漿人與酒正奉之之文雖同而所奉則異酒人漿人奉之於酒正者也酒正奉之奉之於王朝者也不曰使其屬而曰使其士奉之謂其同官之下士耳鄭注以士爲奄非是序官惟內小臣奄稱士鄭云異其賢合乃通稱奄爲士則內小臣之賢者亦何以別於羣奄乎

鹽人惟掌鹽之用而地官虞衡之後不設掌鹽蓋王畿內鹽非所產也禹貢青州貢鹽卽今之青登濟萊等處鹽其地在齊職方氏幽州利魚鹽卽今之長蘆鹽其地屬燕左傳郇瑕氏國饒近鹽卽今解州池鹽其地屬晉諸侯各貢所有則鹽人所用其三國之貨貢與鄭注飴鹽爲戎鹽其蕃國之貨寶與意當時侯國產鹽之地或亦設官爲守予其民以斥鹵之地使之取鹽以當賦如角人諸官之法至管仲爲鹽筴始計口而增鹽稅每鹽一升加賦二合而賦始重齊之季世有祈望之守則鹽利盡歸于公民始不得私煮耳

王會同諸侯止宿之舍設棧桓爲衛野宿則設車宮行會同之禮則爲壇壝宮宮有四門仍設棘以爲衛也

九賦本皆有職之民所貢之財但九賦自一至八皆以地言須兼九功言之乃見出賦之人所以言九賦必及九功也九功中

臣妾不貢疏材此舉其大綱未暇細別間師乃分析言之以某賦待某事蓋的計其財用之相當爲之式法非必以其地之所出給此用也而先儒說者多固滯

凡邦國之貢以待弔用亦謂取之諸侯者還用之諸侯耳非謂弔用必取給于九貢而九貢必不可爲他事用也舉弔用亦兼凶禮之喪荒禴恤

凡萬民之貢以充府庫此對邦國之貢言之卽九功所出之財賦非別有貢物也充府庫卽是待諸事之用前分言此總言耳有法度之玉典瑞掌之良貨賄之玉玉府藏之服玉佩玉珠玉食玉含玉皆良貨賄之玉也圭璧琮璜等有法度之玉也含玉兩官竝其豈玉府共之于典瑞而典瑞乃共之以含與然典瑞又有飯玉宜亦玉府先共而此不言蓋詳畧互見也

凡王之獻金玉兵器文織良貨賄之物受而藏之注謂王用以獻遺諸侯恐不然此謂臣下有獻于王如曲禮所謂大夫私行反必有獻少儀所謂君將適他臣如致金玉貨貝于君是也四方之幣獻則入之內府

以九賦之法令田野之財用以九功之法令民職之財用九賦主地九功主人其實田野之財用皆出於民職此相對疊言之耳非有二項之財用也

凡受財者受其貳令而書之受財卽大府所謂官府都鄙之吏及執事者受財用是也貳令大府之副令也

瑤爵亞王醕賓之爵註謂亞王酬賓之爵非也以幣酬賓之禮

惟獻末王一行后則無酬凡后獻皆用瑤爵上言瑤爵亦如之
所以別於裸用璋瓚耳

歲終則會內人之稍食稽其功事注疏以內人為女御非也此
即典婦功之內人與典絲之內工是宮中專治女功者

闈人掌守王宮之中門之禁凡庫門雉門應門路門皆當王宮
之中故謂之中門對宮中闈門巷門言之非以雉門為中門

皇清經解卷二百四十四終

嘉應楊懋建舊校
番禺趙齊嬰新校

皇清經解卷二百四十五

學海堂

周禮疑義舉要

婺源江歲貢 永著

地官一

鄉老是三公之致仕者行鄉飲禮當為遵有無不定故附見於
鄉大夫而無職掌

閭師任民通乎鄉遂而所掌以鄉為主又以閭為比法之小成
閭胥主徵令而閭師亦掌徵賦故以閭名官

縣師雖通掌内外地域而所主實為家稍縣都及其間之公邑
三等稍地縣為中故舉中以該之注謂縣師主天下土地人民

已下之數非也天下土地人民自有職方氏掌之亦但知其數
要耳其詳數自在列國諸侯若縣師者上士中士止六人豈能

一一稽之又四郊以內之人民田萊等自有鄉遂之官稽之亦非縣師之職

師氏保氏別有其官非三公中之師保注謂周公召公兼之非是

考工以脂膏羸羽鱗分五大獸此及月令以羽毛鱗介羸分五蟲所指各異羸物宜原隰自當如月令倮蟲屬中央以無羽毛鱗介者爲羸鄭注皆以虎豹之屬釋之誤矣

鄭以駢剛之屬解九等而以十二分野解十二壤未確壤者工之類正是駢剛赤緹等然草人言其九合之禹貢又不止十二意當時別有農書詳之草人所未言者其爲塗泥黃壤青黎三種乎九等當如禹貢分田爲九等

周都洛邑欲其無遠天室而四方入貢道里均人謀則成王已遷鼎鬼謀則周公召公先卜河朔黎水再卜澗東瀍西以審定之所謂土中者合九州道里形勢而知之非先制尺有五寸之士圭度夏至景與圭齊而後謂之土中也既定洛邑樹八尺之表景長尺有五寸是爲土中之景乃制土圭以爲法他方度景亦以此土圭隨其長短量之是景以土中而定非土中因景而得也賈疏謂周公審慎者近之漢時天學未明所謂考靈曜者漢人妄作見日行有南北寒暑進退求其故不得遂爲四游之說又謂升降于三萬里中鄭氏意地中半於三萬里遂謂景常以千里差一寸其說甚謬景之差日近天頂則少遠天頂則多本非平差何得限以千里差一寸唐太史監南宮說自滑臺至

上蔡武津分地節節測之謂大率五百二十六里有寄畧差二寸餘斥舊說之妄見唐書天文志可考也

經文本謂測景以建王國則當時惟於東都王城測之至漢儒乃謂潁川陽城爲然陽城今登封縣在洛之東南此別有其故蓋黃赤道閉之緯度古闕而今漸狹漢時王城夏至日稍偏南而景微長必進至陽城然後舍土圭也然唐志言陽城景尺四寸七分八釐則漢時宜更短於此漢唐人之言未知孰得其真測景惟能知南北之差若東西則隨人所居而移經謂日東則景夕日西則景朝者言其理當如是非真能同時立表知其東表日已昞西表日未中也西法則東西里差以月食時刻先後定之疏立五表之說亦同

五等諸侯之地亦大槩立之法耳其實當時行之因事制宜不可一例有功出封者爵雖侯而地不妨多如封魯土田陪敦敦者加厚也或其先世爲尊爵無罪可貶無功可進者爵仍其舊而地不必增如州公薛侯是也虞公虢公疑皆周卿士之公猶之周公祭公或畿外無地可封亦祇食采畿內又有國在此而地在彼如魯之許田鄭之祊衛之有閭土與相土之東都皆不能以一率齊讀周官者當會此意

諸侯之地土田爲實封若附庸在其封內雖爲社稷臣而不得有其地名山大澤有不以封者其餘山川藪澤斥鹵磽确之地與夫城郭宮室溝塗皆不可食者統而計之大國宜有數百里小國亦不下百里此周禮與孟子王制所以不能同周禮就其

虛寬者言之孟子王制惟舉土田實封耳天子地方千里公侯皆方百里猶曰天子萬乘諸侯千乘得什之一耳大國百里次國七十小國五十猶曰以九爲節以七爲節以五爲節大約降殺以兩耳豈能截然齊二畧無增損於其間哉

子產對晉之辭曰昔天子之地一圻列國七十同自是以衰此言與孟子王制合與周禮違當觀其所以立言之意此因晉人責其侵小而晉人自有兼數圻之失故子產不欲舉大國虛寬大數而惟舉一同之制以顯兼數圻之多使晉人因其言反詰之若曰鄭之先豈能七十里之制乎則鄭亦豈能無瑕而晉人不敢以是反詰者兼數圻之瑕大也子產亦逆知其不敢詰也故爲是言然則孟子亦因當時列侯地大過制故舍虛寬之數不言而惟舉百里七十里五十里之制其言有所爲也王制則述孟子者也不然孟子生近齊魯豈真不知齊魯始封尙有餘地而云儉於百里哉

先鄭云其食者半公所食租稅得其半耳其半皆附庸小國也屬天子參之一者亦然是謂其食者爲諸侯後鄭云大國貢重正之也小國貢輕字之也是謂其食者爲天子以文勢言之土其地制其域凡云其者皆指侯國則其食亦當指諸侯先鄭之義爲長大司馬令賦上地食者參之二中地食者半下地食者參之一亦謂其可食者也司勳凡頒賞地參之一食亦謂受賞者食其參之一其餘以食民以供上也先鄭以其半爲附庸小國屬天子參之一者亦然蓋謂小國無附庸然亦當并山川及

不可食之地言之乃近密諸侯固各有貢然九貢皆貨賄服物
不貢粟米則天子不食諸侯之地不可謂之食制其貢亦惟以
其所有耳豈舉其地之半參之一四之一而責其貢哉後鄭正
之字之其言雖美非實事也小國可食地少而虛寬之數多其
猶下地萊三百畝亦所以優之與

田休一歲二歲不耕所以養地力也南方無休不耕之田非盡
由地美亦由糞田之力勤而糞田實勞且費北方糞田尤艱故
有休田之法

本俗六安民一曰媿宮室宮室不完固則民輕去其鄉墳墓不
能族兄弟師儒朋友不能聯故以是爲安居之本

職事十有二稼穡至生材卽大宰之九職其學藝世事服事此
三職非生材之人生材先鄭謂九職之閒民轉移執事者得之
閒民執事於農工商賈虞衡之家皆所以生材後鄭謂養竹木
者非是

夫家九比之數先鄭謂九夫爲井後鄭謂出九賦之人數皆非
是下經頒比法三年大比鄉師以國比之法下及車輦馬牛則
比者簡閱校計之意宜讀毗志反非若五家爲比之比讀必二
反爲連屬相從之意也通諸官考之疑九比者夫家一人民二
田三萊四畜五車六輦七稼器八兵器九夫家爲九比之首八
者皆夫家之所有故云夫家九比之數下經使各登其鄉之衆
寡六畜車輦約舉之辭辨其物以歲時入其數則通九比之物
而別異之也

六鄉之法五家為比五比為閭四閭為族五族為黨五黨為州
五州為鄉卒伍之法五人為伍五伍為兩四兩為卒五卒為旅
五旅為師五師為軍又云凡起徒役毋過家一人極似家出一
人為兵如管仲以十五鄉三萬家出三萬人之法信如此則天
子六軍惟取足於六鄉何為六遂及甸稍縣都皆有作民師田
行役之事六遂以外之民皆家出一人為兵則王畿千里可出
數十軍何為限以六軍以此言之小司徒會萬民之卒伍而用
之亦言其聯絡卒伍之法當如此果有軍旅或調遠或調近必
有更休之法當不令遠地獨逸近地獨勞上地中地下地家家
雖有可任之人亦自有均平之法當不令下地家五人亦與上
地家七人者同出一人為兵也管仲之法則是家出一人為兵
蓋是時兵農已分居土鄉而受田者征其人不征其稅居野鄙
而受田者征其稅不征其人豈亦倣成周六鄉出六軍之制而
變通之耶

天子六軍取之六鄉而六遂與甸稍縣都亦有兵所以防守不
在六軍之中即天子六軍亦所以備制若有征伐猶徵兵於諸
侯王朝將帥元戎十乘以先啟行不盡用六軍也觀桓王伐鄭
有陳人蔡人衛人從則盛時可知矣畿內六軍與六遂甸稍縣
都之兵大抵為防寇盜而設故小司徒云唯田與追胥竭作畿
內若有盜賊雖羨卒猶當用之矣平王時以畿內之民戍申戍
甫諸侯不為天子守而王民反為諸侯守揚水之詩所以作也
管仲變成周之制以士鄉十五為三軍則猶是六鄉為六軍之

遺法他國軍制大約相似雖云寓兵於農其實兵自兵而農自農雖云無養兵之費而六鄉之田卽是養六軍之田猶後世之屯田也六鄉之民六軍取於斯與賢能亦取於斯齊之士鄉亦如此此則古今制度本不相同者也唯田與追胥竭作愚亦疑其有更休一歲四田正羨盡行得毋勞民妨農大蒐于紅自根牟至于商衛革車千乘不常用也春秋必謹而書之若盜賊竊發當調其近者而追之

經土地而井牧其田野沃用井隰臯用牧有此通融之法則凡高下低邪之地皆可以方田之算術齊之無地不可井矣但有公田無公田其制不能畫一孟子請野九一而助國中什一使自賦是有通融之法而國語亦云先王制土藉田以力而砥其遠邇此言似與孟子合藉田以力助耕公田也砥其遠邇似謂遠者用助法近者可用貢法也而小司徒惟言九夫爲井未及論其中區之爲公爲私載師任地近郊什一遠郊二十而三甸稍縣都皆無過什二似皆無公田司稼巡野觀稼以年之上下出斂法亦惟皆私田乃有不定之斂法如行助法則惟以公田之稼歸公不必論年之上下矣此周官之大疑義有不可強通者據司馬法畝百爲夫夫三爲屋屋三爲井而小司徒言攷夫屋旅師言聚野之屋粟是用夫三爲屋之法矣用屋法則非八家同井之法

司馬法通成終同封畿以十起數計里也小司徒井邑邱甸縣都以四起數制賦也甸與乘古字通稍人掌令邱乘之政令卽

邱甸左傳良夫乘衷甸卽衷乘因一乘當用四馬其制成于六十四井故皆以四起數此與計里之法本不相通而亦可相通者井田與道里有實數有虛數也是以漢志云一同百里提封萬井除山川沈斥城池邑居園圍術路三千六百井定出賦六千四百井戎馬四百匹兵車百乘而一封三百一十六里出千乘一畿千里出萬乘亦皆以百分之六十四爲實三十六爲虛則一成十里亦以一甸六十四井爲實三十六井之地爲虛矣漢志之文疑亦出古司馬法是皆約計通率謂山川沈斥城池邑居園圍術路約除三之一有奇耳而鄭注小司徒一甸八里一成十里其緣邊一里之地治溝一都八十里一同百里其緣邊十里之地治洫治澮此鄭以意言之未實計溝涂之積數也

溝涂之積無幾豈能占百分之三十六哉

注引司馬法一乘士十人徒二十人與甲士三人步卒七十二人之法異賈疏及坊記制國不過千乘孔疏皆謂都鄙之軍制非也七十五人者邱乘之本法三十人者調發之通制魯頌公車千乘公徒三萬正與司馬法合

鄉師輦輦注謂輦駕馬說文亦謂大車駕馬非也愚謂從後推之曰輦從前挽之曰輦輦從共以兩手拱而推也今有後推之車

國中復多役少宜早征而晚免野復少役多宜晚征而早免今乃反之恐不如注說蓋國中民多脆弱故晚征而早免野民耐勞苦故早征而晚免此征謂力役之征注謂賦稅非也

疑六遂之外公邑采地亦當有比閭族黨州鄉之法以聯其民但其長未必有大夫士之爵而邑之小者僅如一鄉則其鄉大夫卽邑大夫爲之乎

鄉大夫職經文各憲之於其所治爲一句國大詢于眾庶爲一句賈疏可考唐石經國止誤衍之字俗本注疏遂以之國屬上文鄉中安得有國乎雖石經不足爲據

鼓人所教不止鄉民凡王朝用樂之鼓亦此官教之其言神祀社祭鬼享不必皆州黨之祭祀也救日月詔王鼓大喪詔大僕鼓則此官固在王朝所以不屬大司樂者因其兼教四金磬鼓爲軍旅田役之用故屬之地官耳

國語云戰以錙于丁寧警其民也則軍中自有金錙疏謂不見所用非也

遠郊有牧田以授九職中之藪牧使牧六牲卽以牲物爲貢牧人掌之國有祭祀牧人共之於王朝牛入地官牛人充人及司門羊入夏官羊人豕入冬官豕人犬入秋官犬人而豢於地官之槁人雞入春官雞人馬入夏官圉人馬牲唯有事于四海山川及喪祭遺奠用之將祭祀則各官供之小宗伯毛而辨之頒之司徒宗伯司馬司寇司空使其奉之牛爲大牲所用者多則遠郊又有牛田牛人掌之養國之公牛而祭事用牛者與牧人並共也十二閑之馬別有校人諸官掌之非牧人之職也羊人云若牧人無牲則受布于司馬使其賈買牲而共之此謂牧人有時偶乏羊牲則於長官受布買牲以其王朝之用非謂共之

於牧人也或引此文證各官皆共牲于牧人則載師之牧田大宰之藪牧閭師之任牧貢鳥獸脈絡不得貫通矣

先鄭謂塵市中空地未有肆城中空地未有宅者後鄭易之云塵里若今云邑里居矣塵民居之區域也里居也後鄭爲長然亦當兼市宅言之乃備

以場圃任園地謂城外有可爲園圃之地授九職中藝園圃者使貢草木果蓏之物場人掌之非農民築場圃納禾稼之場圃也農家場圃自於塵地作之與此無涉

先鄭謂宅田爲民宅以備益多後鄭引士相見禮謂致仕者之家所授田後鄭爲長致仕者亦唯大臣及羣臣之賢能者有田以優之閒散職未必皆授田也宋之祠祿猶有古意

士田先鄭謂士大夫之子得而耕之田後鄭謂圭田先鄭爲長學校中之士當於此養之若圭田當在賞田之中

賈田先鄭謂吏爲縣官賣財與之田後鄭謂在市賈人其家所受田後鄭爲長漢志工商家亦以口受田五口當農夫一人然則百工造作於官府者其家當亦有田或於官田中授之其在民閒爲工者亦予以田如賈人之例使之貢器物以當田賦也官田先鄭謂公家之所耕田後鄭謂庶人在官者其家所受田先鄭爲長庶人在官祿足以代耕當是給以稍食

牛田牧田兼用先後鄭之說皆是授民以田而爲公家畜牧卽九職之藪牧養蕃鳥獸閭師之任牧以畜事貢鳥獸者也牛田牛人掌之牧田牧人掌之若十二閑之馬當自有牧地蓋亦在

近郊遠郊此不言者主於田也司勳又有加田無國征蓋亦在賞田之中

近郊遠郊七種之田皆農田外之閒田自近郊以外皆有之不定在近郊遠郊故不言下經近郊什一遠郊二十而三則農田在其中矣

國語載孔子之言曰先王制土藉田以力而砥其遠邇是田賦有遠近取平之法禹貢甸服五百里近者貢粗而且服遠者貢精而不服是虞夏砥遠邇之法也載師近郊十一遠郊二十而三甸稍縣都皆無過十二是周官砥遠邇之法也取民固不過十一然力役先取諸近近者多而遠者少其勢不得不然益遠民之賦以補近民之力政乃均平使可一槩而施則禹時何不

以粟米責之三百里內以總秬秸服均之三百里外乎多乎什一大桀小桀此爲法制外橫征者言之若通融遠近以立均平之法乃王政也非橫斂也如後世徵糧之法地有不便納本色者許納折色而正供外量加解費亦民所樂從後人多疑周官亦未深思之耳

載師以公邑之田任甸地而公邑大夫不見於經非不見也六遂之法通行于野公邑采邑皆有遂大夫以下諸官遂大夫縣正亦卽公邑大夫經舉六遂以爲例耳管仲參國伍鄙之法鄙有五屬大夫以統縣帥鄉帥卒帥邑有司蓋倣周法而變通之者也

里布布非布帛謂泉也里字之義有三一爲三百步之里一爲

二十五家之里一爲里居之里里布者里居之里此經以廛里任國中之地遂人以田里安甿王制田里不粥孟子收其田里皆此義卽謂其所居之宅也宅而毛則有嬪婦之貢其不毛者是棄地不因其不毛而遂無征也里布之輕重雖不可知鄭注以爲二十五家之里則太重矣或又以爲方里而井之里皆不明里字之義

朱子謂此經待士大夫之有土者宅不毛謂其爲亭臺田不耕謂其爲池沼民無職事者謂士大夫家所養浮泛之人此說甚確此皆當征之賦非罰游惰之謂

屋粟又見旅師自是當時征稅之名不知其多少也田不耕有多少當量田而出粟豈可限以三夫

民無職事而責其出一夫百畝之稅一家力役之征立法太重勢必難行不行而法弛先王當不爲此自是後儒解者失之耳考諸經凡言有夫家者猶云男女無妻者爲夫有妻者爲家此言出夫家之征謂其人若未受室或喪其妻則出一夫力役之征已有家則并出嬪婦布帛之貢也

以時徵其賦承上文里布屋粟夫家之征載師惟徵此三種之賦也其粟入于旅師

家有種桑麻之地故使嬪婦貢布帛所謂布縷之征也

此經凡無職者與農圃等同列卽九職中之閒民夫布亦是閒民本身正賦蓋六七尺以上皆有力役之征閒民傭力於人不能赴公甸之役故使出夫布以當三日二日一日之用似後世

皇清經解 卷一百四十五
之僱役錢非罰也先儒謂傲游惰者誤

夫布之多少大約以公甸三日爲率如一日傭力可得錢三十則三日九十以此布入官可免三日之役也與今時丁錢相似孟子塵無夫里之布未布卽此經之夫布里布卽載師之里布蓋戰國時爲一切之法凡居塵之民不問其有職無職而皆使出夫布亦不問其毛與不毛而皆使出里布此額外之征故欲其除之

九職中惟臣妾不責其貢疏材憫其爲人奴婢也委人之薪芻疏材木材掌茶之疏材自是取之於虞衡及山澤之農九職除臣妾析虞衡爲二仍是九故大府言九功之人不績者不衰斬衰齊衰當心前長六寸廣四寸之布謂之衰不績之人遇有斬齊之喪其衰服不設此布以恥之非不服喪服

縣師以縣爲名所主者甸稍縣都然縣都外連邦國甸稍內連郊里其閒四等公邑犬牙相錯故通邦國郊里與稍甸都鄙之地域言之正所以別其爲甸稍縣都之地域以爲辨稽張本也縣師實不掌邦國亦不及郊里下言辨其夫家人民田萊之數與其六畜車輦之稽又云作其眾庶所謂其者指縣師所主者言之耳鄭氏謂縣師主數周天下在應電謂調兵通乎天下是以卑官而參大司馬之權謬矣

縣師所掌謂邦國與都鄙稍甸與郊里其閒相連之地域縣師主分別之不得侵越而先儒說者皆誤

甸稍縣都地廣民衆縣師上士二人中士四人所以能辨稽者

都家公邑亦倣鄉遂各有親民之吏以邦比之法校登之縣師則按籍辨之稽之耳攷羣吏者攷甸稍縣都之羣吏也

稍人言作其同徒輦輦帥而以至是稍人自帥也此言使皆備旗鼓兵器以帥而至是使都家公邑之長帥而縣師不帥也稍人職以縣師之法作之則是縣師受法于司馬稍人受法于縣師縣師是中閒稟令施令之人不惟不帥師徒而致于鄉師者亦非其職疏帥而致于鄉師則於經文以帥而至者不協又侵稍人之職矣

凡造都邑量其地而制其域職首通掌地域謂與甸稍縣都相連已定之地域此則新制之地域也

以歲時徵野之賦貢六遂以外通名野此謂徵公邑之民賦與三等采地之貢也公邑之民賦邑大夫徵之縣師以入大府三等采地大夫食其地仍貢其餘於王亦縣師徵之其委積隨地積之遺人掌之

王朝設都鄙之官禮事有都宗人家宗人軍事有都司馬家司馬刑事有都士家士惟徵斂財賦王朝不爲設官但稟載師甸稍縣都皆無過十二之法自設官徵斂而縣師第徵公邑之已在官者及都家之當入于王者耳其疏材等物委人斂之若謂縣師親徵民賦則公邑民賦繁多豈上士二人中士四人所能徵哉


遺人委人皆掌委積而所主不同遺人兼有薪芻而所主者粟米之積委人主薪芻疏材木材凡畜聚之物之積藉阨老孤凶

荒之民以粟米爲急若薪蒸疏材等物亦須其人自取國家不能徧給唯賓客羈旅不能自取旣須粟米又須薪芻畜聚等物故遣人給其飲食而委人又以稍聚待賓客以甸聚待羈旅也委人又云凡其餘聚以待頒賜此謂薪蒸疏材等物若有餘亦頒賜於羈阨老孤凶荒之民此出特恩不可爲常如無餘則亦不頒賜矣後世賑荒阨養孤老亦止給穀米不能給薪菜財物有限也後人讀此二職不知委積之不同因委人言稍聚待賓客甸聚待羈旅遂謂遣人不掌稍甸之委積誤矣遣人之委積自鄉里至縣都皆掌之但所主者粟米非委人之所聚者耳

公甸之甸當讀如字公甸者公家力役之程日也力役以甸計左傳令尹蔦艾獵城沂事三甸而成不愆于素士彌牟營成周量事期城三甸而畢公甸卽此甸字舊讀均非是力役或一甸二甸三甸而一夫不過三日三日之外他役代之

若是殺人而義者不當報報之則死如殺人而不義者王法當討不當教之辟也此辟讎者皆是過失殺人於法不當死調人爲之和難而讎家必不肯解者乃使之辟也使之辟而不辟則有逆命之罪於是調人與報者以瑞節爲信使其執至官而治之也此瑞節亦不必是刻圭注謂圭以刻圭使調人執之治其罪非也如調人當執則以官法執之可矣何必王與瑞節節必使讎人自執者欲伸其報仇之情也執至官而治之則亦不許其殺也經無王與調人瑞節之文故知是調人與仇家有引典瑞謂此瑞節爲穀圭者亦非也穀圭以和難和諸侯之

難耳非令辟讎之謂既以執之又何和難之有
 凡殺人而義者令勿讎誤衍不同國三字殺人而義謂當官治
 人罪戰陳殺人或為姦盜被殺之類注謂父母兄弟師長嘗辱
 焉而殺之謬矣辱亦有輕重豈可遂殺
 判妻入子一說娶判妻謂娶人所出之妻入子謂再嫁而攜其
 女入後夫之家者此說是書之者防其爭訟也
 有故而遲歸者或因貧乏或因災禍於中春令會男女之時許
 其不備禮而昏標有梅之詩是也若無故不用是時不禁之令
 而造次成昏者則罰之此職本無可疑
 中春令會男女亦謂此時陰陽和宜嫁娶耳非必以此為限



皇清經解卷二百四十五終


皇清經解

卷二百四十五

江歲貢周禮疑義舉要

庚申補刊

漢軍樊封舊校
番禹趙齊嬰新校



皇清經解卷二百四十六

學海堂

周禮疑義舉要

婺源江歲貢 永 著

地官 二

市之羣吏平肆展成奠賈平肆者平其肆之貨賄不使其名實相紊也胥師賈師肆長二職皆言平而肆長尤其專職展成奠賈則賈師之專職也展成即質人掌成市之貨賄之成謂以所買賣之物書之質劑成其交易奠賈亦以其物之賈書之質劑皆賈人省之定之也

辟布謂民有遺失泉布至市求覓者令其於遺失處求之也量度者謂民有爭量度不平者借市中之度量以平之亦令其於附近之地也

國君過市則刑人赦魏氏謂不言王者不敢斥至尊故舉國君
爲況此說是然則夫人過市亦以況王后也刑人赦亦但赦市
中憲徇扑之刑耳非謂市中刑殺大罪亦赦之也幕帟蓋帷皆
所障蔽之物罰之以示不當遊市所以恥之也若衛靈公與夫
人同車宦者參乘而招搖過市尤不知恥者也

王制戎器不粥於市此得賣兵器者弓矢佩刀服劍之類皆常
用器宜不在禁限戎器其謂甲冑戈盾之類與王制又言兵車
不中度不粥於市則兵車中度者亦可粥也

紵布先鄭謂列肆之稅布得之紵卽次字之異文王氏謂胥師
罰在次詐僞者之布謬甚罰詐僞當入罰布何得於此首列列
肆有稅猶民之廛里有稅不必因孟子廛而不征法而不廛之

說曲避其名也

總布杜子春讀總爲儻謂無肆立持者之稅後鄭讀如租穗之
穗謂守斗斛銓衡者之稅二說皆非無肆立持此販夫販婦鬻
賣小物暫立卽去守斗斛銓衡乃閒民傭力於商賈皆不當征
其稅王氏謂肆長總斂在肆諸物之布得之肆長陳其貨賄辨
其名實而平正之又斂其總布正是貨物之布

質布後鄭謂質人所罰犯質劑者之泉王氏謂質人罰度量犯
禁者之布皆非是罰則當入罰布何爲別名質布愚謂此卽償
質劑之布也古未有紙大券小券當以帛爲之交易以給買者
而賣者亦藏其半質劑蓋官作之其上當有璽印是以量取買
賣者之泉以償其費猶後世契紙有錢也

皇清經解 卷三十四 江歲貢周禮疑義舉要 三庚申補刊
罰布有三質人罰度量淳制之犯禁者一也胥師罰詐偽飾行
價慝者二也胥罰有罪者三也而凡犯禁之類如不當粥而粥
乘天患而貴債皆有罰布可知矣鄭注謂罰犯市令者之泉是
矣而質人罰犯質劑者之泉卽是詐偽飾行價慝者之罰乃別
之入質布則罰布之類不該矣

廛布鄭注謂貨賄諸物邸舍之稅疏謂貨賄停儲邸舍之稅得
之廛與紵異者紵是賣物之肆廛是停儲貨物之舍賣者買者
皆有之今時謂之棧房賣者肆中不能容則停貨物於廛買者
當時不能卽運又或儲之以待時鬻亦須廛此廛亦是官物故
當有稅

五布之次序先列肆次貨賄次質劑次罰布而後及廛廛亦地
稅不序於紵布之後者總質罰皆肆中之物事廛在肆外故序
之在後屬辭之體宜爾也官獨以廛名者舉廛以該肆也五布
惟總布最多地稅有定質劑物微罰布無常貨賄充物市廛源
源而至非廛人所能盡稽故必使每肆之肆長斂之入於廛人
此總布是商賈之正賦猶農之九穀嬪之布帛工之器物大宰
所謂市賦閭師所謂任商以市事責貨賄者此也商雖不以其
所賣之物爲貢而布亦卽貨賄先儒失總布之義而諸職脈絡
不得貫通矣

周官所征者征諸商賈也若無肆立持者販夫販婦耳豈可征
其貨乎市中守斗斛銓衡者是閒民轉移執事之人本身自有
夫布必不征其總布

飾行僨慝皆詐偽之事飾行者詐於事如魯人朝飲其羊以詐市人之類僨慝者詐於物如賣柑者金玉其外敗絮其中之類注謂使人行賣惡物於市未是

都鄙從其主國人郊人從其有司自此長鄰長以上皆可謂之主有司其爲公邑稍縣都做鄉遂之制各有其主不必公邑大夫與食采大夫然後謂之主也從泉府買一不時須之物必關白大夫恐難乎其爲買矣

凡民之貸者與其有司辨而受之注謂與有司別其貸民之物定其賈以與之非也辨者辨其人之可貸與否也如其人有生業不爲游惰是可貸者也否則貸不能償當不許其貸矣此所貸者是貨泉非貸滯於民用之物

以國服爲之息後鄭說近是一說令國服役以償所貸亦通但謂息爲保息之息則非既償貨泉又服役以償息非謂不取息也唯賒者不取息

關市無征文王法外之仁也廛而不征法而不廛孟子救時之論也征而勿苛取之有度是亦經常之法周官所不廢也惟是古今情形不同回市以下諸官昔時行之不以爲厲後世有一於此則民不勝其擾矣

正其貨賄舊讀正爲征後人欲避征貨賄之事不讀爲征然司關明言凶札無門關之征而遺人以門關之委積養老孤則門關皆有征明矣若謂養老孤之財惟出於犯禁豈豫設用財之事以待犯禁之人乎終年無犯禁將不養老孤乎宋國以門賞

形班使食其征謂之形門門征之見於傳者也

關上宜無塵而亦有塵者謂貨賄物多暫有停閣以待有司之稽察也物少則不必停於塵與其征塵舊解貨賄之稅與所止邸舍之布後人欲避征貨賄之事謂征塵惟征邸舍其意則厚而非事實

惠士奇云司關掌國貨之節以聯門市其法管子行之於齊以爲市者天地之材具也萬人之所私而利也關者諸侯之陬隧也而外財之門戶也萬人之行道也征於關者勿征於市征於市者勿征於關此司關聯門市之法也市有塵布關有征塵皆貨賄停儲邸舍之稅自外入者征於關關移之門門移之市所謂征於關者勿征於市也自內出者征於市市移之門門移之

關所謂征於市者勿征於關也若自內而不由於市自外而不出於關然後舉而罰之否則征其塵而不稅其貨也康成謂參相聯以檢猾商則失之矣按關與市不兩征此說固是但專主征塵爲言則未是塵人有歛布總布塵布歛布者市之屋稅總布者貨賄之正稅塵布者市之地稅也古者建國王立朝后立市國中大小之肆皆是公家之財所成故有屋稅塵者市中空地未有肆停貨物於此則有地稅土者皆非商賈之正賦閭師云任商以市事貢貨賄總布正是貨賄之稅貨有貴賤賄有重輕舉其總數以計布故謂之總布三布中總布最多故使每肆

一人之肆長隨時斂之以歸塵人而塵人以入泉府也司關司貨賄之出人者掌其治禁與其征塵此征塵是二事征者貨賄

皇清經解 卷三十四
之稅也塵者貨賄停閣邸舍之稅也若不停閣則無塵布矣不
得以征塵爲一稅遂當關上貨賄之征也

掌節掌守邦節而辨其用以輔王命此經爲下文諸節提綱玉
角虎人龍固邦節而符璽旌通行於民者亦邦節也辨其用下
文所云是也以輔王命者天下皆統於王王遣使固是王命凡
天下臣民往來必有節乃達亦所以輔王命也凡諸官所掌後
有事目者於職首先提其綱屬文之常此職亦然舊注失其指
謂邦節爲珍圭牙璋穀圭琬圭琿圭此圭璋掌於典瑞不掌於
守節此泥王命二字而誤也守邦國者用玉節守都鄙者用角
節此謂諸侯與都鄙大夫遣使不出竟內者用之凡邦國之使
節注云卿大夫聘於天子諸侯行道所執之信是也此卽小行

人之虎人龍節鄭彼注謂使之四方亦皆齋法式以齊等之是
也陳氏祥道乃分爲二謂小行人所達者邦國使於王侯者所
執此官所掌以輔王命者王朝使於邦國者所執此又泥王命
二字不達事理者也夫列國之使各用其虎人龍節以爲行道
之信觀其用虎節知其自山國而來人龍亦然注所謂自其國
象是也若王朝遣使邦國則必用玉節豈因其所使之國而從
彼國之象哉且王使或非一國道塗所歷有山有澤有土豈到
一國又易一節乎守邦國猶用玉節豈王使反降而用金節乎
近又有因陳氏之說并謂王使所過道路則鄉遂之官授以旌
節所歷門關則守疆之吏授以符節如此則王使易節不勝其
煩別國之視王使幾如奸人閒諜矣

珍圭牙璋穀圭琬圭琰圭此皆王使所執以達王命之玉非道路上爲信之節也道路爲信當如守邦國者之玉節玉節之制當不同於圭璋王聘諸侯非有他故則使者執瑑圭以達王命又不同於珍穀琬琰也學者當細辨之不得以珍圭等爲聘問之玉又不得以典瑞之瑞爲掌節之節

單子述周之秩官曰敵國賓至關尹以告行理以節逆之此謂行理以節爲信將其逆賓之命非謂以節授賓使其道路爲信也豈有王使諸侯須侯國沿途授節而後可歷門關哉

小行人不言璽節璽節非以竹爲鄭注今之印章是也旌節鄭注今使者所擁節是也此似蘇武所仗之節然小行人旌節亦以竹爲之而顏師古注漢書云節以毛爲之上下相重取象竹節因以爲名則是象竹而非竹疑漢節未必卽古之旌節

小行人都鄙用管節管節與角節異者角節都鄙大夫遣使之節管節都鄙之吏授民之節然此經道路用旌節亦兼都鄙而小行人旌節管節別異之是侯國之都鄙異于畿內之都鄙也郊以外皆爲野六遂野之始也注謂甸稍縣都是遺六遂矣

以下劑致眡舊謂致爲會新說謂致爲役皆不然愚謂野地廣闊慮其民稀土曠一以下等家一人之率招致田眡旅師凡新眡之治使無征役以地之蠹惡爲之等亦下劑致眡之意也經文屬辭有次第先招致之乃以田里安之以樂昏擾之以土宜教之利眡勸眡任眡皆所以使之稼穡也土均平政之事最在後不當先言役眡若會計之會與致字不相協也

以興鋤利甿舊謂起民人令相佐助愚謂此卽旅師之職興發
耨粟頒之於民施其惠散其利至秋而斂之者也若里宰以歲
時合耦于耨以治稼穡趨其耕耨此當在以時器勸甿之中以
時器勸甿若以歲時合耦于耨之類耨者治田之器也耨粟之
耨亦因其合於耨而名又說見旅師農民最患無蓋藏秋斂之
粟歷冬及春已欲盡東作方興室如懸磬數口之家嗷嗷苦飢
將稱貸于兼并之家則有倍稱之息至秋而斂僅足以償曾未
幾時而又告匱矣耕三餘一耕九餘三安能比戶如此哉故合
野有耨粟之法豫爲之儲旅師聚之又兼屋粟閒粟以益之其
用之也春頒而秋斂并不合其出息於是農人無半歲之飢田
功無荒廢之患而餘一餘三之積亦由此基之此大有利于田

甿之事故此職特言以興耨利甿在時器勸甿之先正是旅師
春頒出粟以散利之事若其春耕已不足雖欲以時器勸之亦
不能枵腹而秉耒矣惜先儒說此句失其義

以時器勸甿三時用田器以耕以耨以穫毋失其時毋惰其力
也

遂人之所謂野實兼都鄙大司徒言都鄙授田之制與此經相
表裏大司徒言其略此言其詳非有二法也六鄉田制亦視此
矣

餘夫亦如之謂其所受田亦分三等如正夫之率不定畝數者
當視其力之所能耕也二十五畝孟子之法也

十夫有溝與九夫爲井亦通爲一法九夫爲井以方言之十夫

有溝以長言之耳

此言治野之法大畧如此十夫至百夫以上皆爲虛寬大數不能細算步畝匠人亦云凡溝必因水執防必因地執磬折以參伍非可畫方如棋局也大川常在兩山之閒豈可限以萬夫哉經牧其田野辨其可食者衍沃隰臯可食者也京陵淳鹵之類不可食或謂君所食非是

遂師遂大夫縣正皆聽治訟其獄訟之大者遂士聽斷之春秋內外傳有司里之官賓客至授館興土攻期于司里此城中掌里居者與遂之里宰無涉釋者皆以里宰釋之誤矣

里宰雖徵斂二十五家之賦而無府史胥徒則里宰不能爲之儲峙亦不能爲之輸將蓋均人有人民牛馬車輦之力征當於二十五家中起徒役以輸之縣師而縣師又以徒役輸之於國也如其里近六鄉者亦可輸之閭師有當存畱爲委積者粟米輸之遺人屋粟閒粟輸之旅師薪芻疏材木材輸之委人凡邑中之政相贊此卽里宰之邑

旅師所掌卽遂人以輿耨利眊之事耨粟者農民合出之因合耦于耨故名耨粟正猶隋唐社倉義倉每歲出粟少許貯之當社以待年飢之用者也旅師所聚以耨粟爲主旅衆也謂主衆眊合輸之粟也耨粟無多恐不足以給又以載師之屋粟閒粟益之此粟不必爲凶年之用卽不饑之歲當東作時皆用此粟頒之待秋而斂之舊讀而用之而字爲若今詳文勢及經意當讀本音與上連爲一句此粟歲歲皆用非謂有時而用也其用

之之法以質劑致民質劑猶今之契券所以爲授受之驗一半給民一半存官待其秋斂合符於官也民卽田野之民平日合出耬粟者平頒其興積積者歲歲之積興者興發之平頒者其數皆均無偏饒偏乏也必平頒者耬粟本均輸頒之有不平則人不肯出耬粟矣施其惠散其利而均其政合此粟補民不足貸而無息是惠利也施之散之農民皆蒙惠利也均其政令者毋有貸而不償抵冒侵欺諸弊也凡用粟春頒而秋斂之此申明用粟之時與斂粟之法粟不斂則無以繼歲歲又有合出之耬粟與增入之屋粟閒粟故此粟可不收息也此旅師之專職後言新毗之治勞來新徙之農是其兼職餘事非謂以此粟待羈旅也羈旅與新毗不同羈旅者他方之民羈留不得歸又未受田爲土著故有委積待之遣人給之粟米委人給之薪蒸疏材若新毗來徙旣授以三等之地卽是土著之民豈得謂之羈旅且耬粟本野民豫積以爲己利豈可奪彼土著之物以散新徙之民乎新毗食土著之粟野民失儲粟之利勸輸不行而良法壞矣注謂耬粟民相助作近之謂一井之中九夫之稅粟非也稅粟當入縣師旅師惟聚此三粟非徵賦之官委人注言野之農賦旅師徵之亦誤

委人掌斂野之賦斂薪芻爲句不得於賦字讀斷委人惟斂薪芻疏材木材凡畜聚之物不掌粟米布帛泉貨諸物之賦也以稍聚待賓客以甸聚待羈旅與遣人之待賓客羈旅者別異委人無遣人之粟米而遣人無委人所聚之物也此義不明將疑

此職何以不言囿老孤凶荒矣凡其餘聚以待頒賜有餘乃頒賜於囿老孤凶荒之民否則不頒賜也說見遺人

稍聚待賓客亦有芻薪又復言共其芻薪前爲儲於廬宿候館以給在道之用此爲共饗餼之芻薪平時積之國都不必委人所歛者也饗餼中物多諸官分職共之芻禾又見於舍人蓋委人共其物而舍人載之手車猶春人舍人各言共米也薪則委人自載之與

聚者通薪芻疏材木材凡畜聚之物言之皆隨地儲待主其地者守以待賓旅道路之用也共則以式待共之有定數

軍旅共其委積薪芻凡疏材注謂委積之薪芻此謂共委人平日少積爲委多積爲積之薪芻對上文所共或有非委人所積者也疏謂大行人委積中有牲牢米禾薪芻之屬委人惟共其薪芻非是

共野委兵器與其野囿財用承上文軍旅而言共野委兵器者野委之兵器猶下文野囿之財用也野委謂軍行止宿薪芻露積于野有守之者故共其兵器有謂通言國野之委者誤野囿財用謂野囿中竹木魚鼈之財亦以給軍行之用也國語曰囿有林池所以禦災言野囿所以別於囿人之牧百獸者注苑囿藩籬之材非是上下文皆言軍旅則此二事皆爲軍旅而共非軍旅無是供也國野委積甚多委人何能一其共其兵器若藩籬之材不可謂之財用

軍旅之賓客疏謂諸侯以軍旅助王征討者是

皇清經解 卷一百一
土均所主唯在畿內不及諸侯其云邦國者謂國都非謂諸侯之國

以地嫩惡為輕重之等如居沃土者當禁其奢侈示人以儉居瘠土者當救其鄙陋示之以禮

草人種字皆當讀去聲凡糞種謂糞其地以種禾也後鄭謂凡所以糞種者皆謂煮取汁先鄭謂用牛則以牛角汁漬其種王氏謂用麻實擣汁漬其種是讀種為上聲恐皆是臆說凡糞當施之土如用獸則以骨灰灑諸田用麻子則用擣過麻油之渣布諸田若土未化但以汁漬其種如何能使其土化惡為美此物理之易明者因讀種字誤遂為曲說今人糞田未見有煮汁漬種者後人說經好破先儒此當疑而不疑何也

農家歲歲糞田欲其肥美多穀也若駢剛諸土未經變化恐非一歲所能化況又惟漬其種乎

以豬畜水以防止水先鄭引左傳町原防規偃豬後鄭云偃豬者畜流水之陂也防豬有隄也愚謂此兩句分二事先鄭引傳甚合後鄭解豬字得之解防字未確此職專掌稼下地凡下地常憂潦田閒之水欲其易出外流之水欲其不入以豬畜水所以分減內水也以防止水所以堵截外水也匠人云凡行奠水磬折以參伍欲為淵則句矩此豬即所謂淵也於溝中作之視其地勢句曲過于矩之處掘深之令水洄復畜聚于此而成淵溝之為淵之處多則田中之水減矣下地常濱大川大澤必為隄以闌之今江南之圍田是也後鄭解為豬旁隄則是陂塘

之隄畜水以備灌溉此平原憂旱之地非下澤憂潦之地矣以涉揚其芟作田先鄭云以其水寫故得行其田中舉其芟鉤後鄭云開遂舍水於列中因涉之揚去前年所芟之草而治田種稻涉字後鄭得之揚其芟先鄭得之下地之田田中常有水足涉水揚舉除草之器以芟之若水盡寫不得謂之涉揚芟是舉器以除新生之草非揚去前年所芟之草

凡稼澤夏以水殄草而芟夷之夏月草盛長乘其水熱殄草之時芟夷之則根易絕明年可稼也

芒種注謂稻麥麥不宜於澤地當是種芒稻也後世五月節曰芒種謂其時可種有芒之稻

旱暵共其零斂下澤有旱暵不常有之事也斂零物於民稻人共之

凡服耜斬季材舊說是王平仲謂車耜器最勞非穉材可任或謂季爲老非也車之勞在輪轂若牝服爲車箱小車則爲輿非當勞之處耒耜人所推不可用大木皆當用柔刃之材爲之季材猶季弟豈可謂之老

澤虞賈疏云山虞林衡川衡皆不言國獨澤虞言國者二虞二衡文有不同皆互見爲義此說是也凡山林川澤皆國所有使其地之人各占其地種莳草木長養魚鼈卽九職中虞衡之民是謂之守而官爲之禁令當取物之時各入其物以爲地職之

貢閭師所謂任衡以山事貢其物任虞以澤事貢其物者也入貢之餘卽是民所自有猶必令其取物有時取之有節若官自

取物不在禁限此二虞二衡之通法也

入木材于官用中冬中夏民自取材別有時王制云草木零落然後入山林是用季秋也

春秋之斬木不入禁亦謂邦工也邦工或非中冬中夏而取木於四野取之不入守禁之山林

以時舍其守從舊說時按視守者於其舍申戒之有讀舍上聲謂弛禁者非經意

廿人與秋官職金聯事廿人掌金玉錫石之守禁而職金受其入征以入於諸府也此不言丹青者文不具

角人疏云言農則皆有夫田出稅近山澤者卽以齒角骨物之屬當地稅此說是也此爲三農之職別於虞衡閭師言貢九穀

者正賦也有他物亦可代之象非周地所產蓋他獸之齒亦有可用者

葛之材惟中絺綌而又言凡葛征蓋蔓草之類如葛者亦征之灰物出於薪有謂石灰煙煤之類恐古時未有石灰而煤炭亦不見經傳

野疏材凡畜聚之物注謂徵于山澤入于委人是也有謂臣妾所聚斂者非閭師不言臣妾之貢惻其爲人奴婢也醫師聚毒藥以共醫事藥物草木爲之多疏材畜聚中當有藥物入于醫師

有謂民之場圃載師任以徵之國之場圃場人樹以斂之愚謂此卽載師之場圃雖場人樹亦是民樹

廩人匪頒卽大宰之匪頒百官之祿是也注謂委人之職諸委積未確且委人亦無粟米

統言匪頒則稍食在其中分言之則諸臣之祿爲匪頒在官工役之稟爲稍食

凡萬民之食食者通計萬民之食非謂食國家之糧食者也疏誤

考工記桌氏之鬴舊說謂六斗四升然以圓算方算皆不合明宗室鄭世子朱載堉據管子輕重篇云齊西之粟釜百泉則鉅二十齊東之粟釜十泉則鉅二泉釜卽鬴也鉅卽區也四升爲豆四豆爲區五區爲鬴鬴乃八斗非六斗四升也此說是廩人謂一月粟米之率以中年三鬴爲常率計之十日食八斗一日

食八升毋乃太多乎蓋桌氏所謂深尺方尺者非夏后氏之尺乃周尺也周尺當夏尺之八寸以八寸計之一鬴八斗僅得四斗零九合六勺則日食四升一合弱耳又以商尺當夏尺一尺二寸半以此爲鬴八斗當夏之十五斗六升二合有奇後世之營造尺與商尺同今時方尺深尺容四斗周鬴四斗九合有奇商鬴一十五斗六升二合有奇約爲四之一而稍贏則今量四斗周量一斗稍贏日食八升當今量一升稍贏正爲今人日食之數與廩人之鬴密合


司祿職雖闕觀其序於廩人倉人舍人之後司稼之前皆爲穀米之類其爲頒穀祿於羣臣可知矣薛氏以爲授田賦祿愚謂諸官之授田食邑者三公六卿王子母弟及諸卿之大夫元士

也其餘散官非特賜當不得有田宜以廩人倉人之粟給之所謂匪頒之式也校人等馭夫之祿是其一隅

又按司士以德詔爵以功詔祿以能詔事以久奠食是有田者為祿無田而授之粟者為食祿必待有功食則能任其事者定其多寡予之也內史王制祿則贊為之以方出之此有功而授田祿者也若食則司祿給之當不關內史分言之祿與食異通言之食亦祿也故官名司祿



食亦謂之秩宮伯月終則均秩月令收祿秩之不當是也莊公十九年惠王奪子禽祝跪與詹父田而收膳夫石速之秩此散官無田有秩之證也謂凡祿皆授田考之亦不詳矣

司稼職所謂興起也發也謂調急之時平其所興發之廩食猶旅師平頒其興積也注謂與所徵賦非也



皇清經解卷二百四十六終

皇清經解 卷二百四十六 江歲貢周禮疑義舉要 漢軍樊 封舊校 番禹趙齊嬰新校 二、庚申補刊



皇清純
角

名
三
品
上
等

共

